

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

RJEŠENJE

**po Prijavi namjere koncentracije privrednog subjekta Čez, a.s. Prag, Republika Češka
i privrednih subjekata Tomis Team S. R. L. , Constanta County, Rumunija i Ovidu
Development S. R. L. , Constanta County, Rumunija**

**Sarajevo
Oktobar 2008. godine**



Broj: 01-04-26-036-6-II/08
Sarajevo, 22.10.2008. godine

Na osnovu čl. 25. stav (1) tačka e) i 42. stav (1) tačka d), u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), rješavajući po Prijavi namjere koncentracije privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika, zastupanog po advokatu Seadu Miljković, Fra Anđela Zvizdovića 1, 71000 Sarajevo, Bosna i Hercegovina zaprimljenoj dana 03. septembra 2008. godine pod brojem: 01-04-26-036-II/08, Konkurencijsko vijeće, na 74. (sedamdeset i četvrti) sjednici održanoj dana 22.10.2008. godine, je donijelo

R J E Š E N J E

1. Ocjenjuje se dopuštenom koncentracija koja može imati uticaja na tržište proizvodnje električne energije u Bosni i Hercegovini sticanjem kontrole od strane privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika nad privrednim subjektom TOMIS TEAM S.R.L., 2 Morii Galbiori, Constanta County, Rumunija i privrednim subjektom OVIDIU DEVELOPMENT S.R.L., 2 Morii Galbiori, Constanta County, Rumunija, kupovinom većine udjela osnovnog kapitala.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 26.09.2008. godine zaprimilo pod brojem: 01-04-26-036-II/08, Prijavu namjere koncentracije (u daljem tekstu: *Prijava*) privrednog subjekta ČEZ a.s. Prag, Duhová 2/1444, Praha 4, poštanski pretinac 14054, Češka Republika, zastupanog po advokatu Seadu Miljković, Fra Anđela Zvizdovića 1, 71000 Sarajevo, Bosna i Hercegovina (u daljem tekstu: *Podnosilac prijave ili ČEZ*), kojom namjerava, kupovinom većine udjela osnovnog kapitala, steći kontrolu nad privrednim subjektom TOMIS TEAM S.R.L., 2 Morii Galbiori, Constanta County, Rumunija (u daljem tekstu: *Tomis*) i privrednim subjektom OVIDIU DEVELOPMENT S.R.L., 2 Morii Galbiori, Constanta County, Rumunija (u daljem tekstu: *Ovidiu*).

Uvidom u dostavljenu *Prijavu* utvrđeno je da ista nije kompletna, te da je treba dopuniti u smislu člana 30. stav (1) Zakona o konkurenciji (u daljem tekstu: *Zakon*) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“, broj 95/06), te je zatražena dopuna *Prijave* podneskom broj: 01-04-26-036-1-II/08 od 19.09.2008. godine.

Podnosilac prijave izvršio je dopunu *Prijave* potrebnom dokumentacijom podnescima broj: 01-04-26-036-2-II/08 od 19.09.2008. godine i broj: 01-04-26-036-3-II/08 od 26.09.2008. godine.

Slijedom navedenog, Konkurencijsko vijeće je Podnosiocu prijave izdalo Potvrdu, dana 29.09.2008. godine broj: 01-04-26-036-4-II/08, kojom potvrđuje podnesenu Prijavu urednom i kompletnom u smislu člana 30. stav (3) Zakona.

Podnosilac prijave je naveo, u smislu člana 30. stav (2) Zakona, da je podnio zahtjev za ocjenu koncentracije nadležnim tijelima za ocjenu koncentracije Republike Srbije, Republike Bugarske i Republike Ukrajine.

Konkurencijsko vijeće je utvrdilo da je Prijava podnesena u Zakonom predviđenom roku, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt ČEZ a.s. Prag, Duhová 2/1444, Praha 4, poštanski pretinac 14054, Češka Republika i privredni subjekti TOMIS TEAM S.R.L., 2 Morii Galbiori, Constanta County, Rumunija i OVIDIU DEVELOPMENT S.R.L., 2 Morii Galbiori, Constanta County, Rumunija.

1.1. Privredni subjekti ČEZ a.s. Prag

Privredni subjekt ČEZ a.s. Prag, Duhová 2/1444, Prag 4, poštanski pretinac 14053, Češka Republika, registrovan u Privrednom registru Opštinskog suda u Pragu, pod registarskim brojem 1581 dana 06.05.1992. godine.

Vlasnička struktura privrednog subjekta ČEZ, na dan 31.12.2007. godine prikazana je u Tabeli 1.

Tabela 1.

Rb	Dioničar	Vlasnički udjel (%)
1.	Vlada Češke Republike	65,99
2.	Ostala pravne osobe	19,04
3.	Upravitelji	10,83
4.	Fizičke osobe	4,14
	Ukupno	100,00

Izvor: Podaci iz Prijave

Osnovna djelatnost privrednog subjekta ČEZ je razvoj električne opreme, revizija električnih postrojenja, proizvodnja i distribucija električne energije, proizvodnja i distribucija toplotne energije i trgovina električnom energijom.

Privredni subjekt ČEZ je vlasnik 100% udjela u ČEZ Grupi. ČEZ Grupa je jedna od najvećih elektro – konglomerata u centralnoj i jugoistočnoj Evropi. ČEZ Grupa također obuhvata i brojna manja društva koja doprinose razvoju osnovnog poslovanja grupe, kao što su telekomunikacije, informativna tehnologija, dizajn, inženjering, društva koja se bave gradnjom kao i društva koja održavaju opremu, iskopavaju sirove rude i proizvode prapatne proizvode za proizvodnju električne energije.

ČEZ Grupa je vlasnik privrednih subjekata u SR Njemačkoj, Poljskoj, Mađarskoj, Slovačkoj, Rumuniji i Bugarskoj, pri čemu je između ostalog vlasnik dva rumunska i tri bugarska regionalna društva za elektrodistribuciju.

Privredni subjekt ČEZ Poland Distribution B.V., Weena 340, 3012 NJ, Rotterdam, Holandija, registrovan u Privrednoj komori Holandija pod brojem 24301380, je u 100% vlasništvu privrednog subjekta ČEZ.

U Bosni i Hercegovini ČEZ ima većinski vlasnički udio u privrednom subjektu Nove elektrane Republike Srpske d.o.o. Gacko i ČEZ Bosna i Hercegovina d.o.o. Sarajevo.

Privredni subjekat Nove elektrane Republike Srpske, d.o.o. Gacko, Industrijska bb, Gacko, Bosna i Hercegovina (u daljem tekstu: NERS) je upisan u sudski registar Osnovnog suda u Trebinju (rješenje broj: 095-0-REG-06-000281), dana 22. decembra 2006. godine, pod jedinstvenim registarskim brojem: RU-1-1864-00. Osnovna registrovana djelatnost privrednog subjekta NERS je proizvodnja i prodaja električne energije.

Privredni subjekat NERS je osnovan zajedničkim ulaganjem privrednog subjekta ČEZ sa 51% vlasničkog udjela i Mješovitog holdinga „Elektroprivreda Republike Srpske“ sa 49% vlasničkog udjela u osnovnom kapitalu istog.

Privredni subjekt ČEZ Bosna i Hercegovina d.o.o. Sarajevo, Fra Anđela Zvizdovića br. 1 Sarajevo, Bosna i Hercegovina (u daljem tekstu: ČEZ BiH), je upisan u sudski registar Općinskog suda u Sarajevu pod matičnim brojem: 65-01-0142-08 dana 21.03.2008. godine. Osnovna djelatnost privrednog subjekta ČEZ BiH je proizvodnja i prodaja električne energije. Privredni subjekt ČEZ BiH je u 100% vlasništvu privrednog subjekta ČEZ.

Privredni subjekti NERS Gacko i ČEZ BiH još nisu započeli sa svojim poslovnim aktivnostima na tržištu Bosne i Hercegovine.

1.2. Privredni subjekti TOMIS TEAM S.R.L. i OVIDIU DEVELOPMENT S.R.L.

Privredni subjekat TOMIS TEAM S.R.L. (u daljem tekstu: Tomis) je društvo sa ograničenom odgovornošću, sa sjedištem na adresi 2 Mori Galbiori, Constanta County, Rumunija, registrovan u Trgovačkom registru pri Ministarstvu pravde Rumunije pod brojem J13/2276/2006 dana 21.06.2006. godine.

Privredni subjekt Tomis u 100% vlasništvu posjeduje privredni subjekt M. W. Team Invest S.R.L. društvo sa ograničenom odgovornošću, sa sjedištem na adresi 2 Mori Galbiori, Constanta County, Rumunija, registrovan u Trgovačkom registru pri Ministarstvu pravde Rumunije pod brojem J13/2466/2006 dana 10.08.2006. godine.

Privredni subjekat OVIDIU DEVELOPMENT S.R.L. (u daljem tekstu: Ovidiu) je društvo sa ograničenom odgovornošću, sa sjedištem na adresi 2 Mori Galbiori, Constanta County, Rumunija, registrovan u Trgovačkom registru pri Ministarstvu pravde Rumunije pod brojem J13/2274/2006 dana 24.07.2006. godine.

Privredni subjekti Tomis i Ovidiu su osnovani kao projektne kompanije čije su glavne poslovne aktivnosti razvoj, građenje i upravljanje dvjema vjetrenjačama u Rumuniji. Navedeni projekti su još uvijek u fazi razvoja, te niti jedan od ova dva privredna subjekta nije operativan.

Vlasnička struktura privrednog subjekta Tomis na dan 31.12.2007. godine prikazana je u Tabeli 2.

Tabela 2.

Vlasnik udjela	Vlasnički kapital (%)
CWP Cyprus Limited	95,00
Emanuel Muntmark	5,00
UKUPNO	100,00

Izvor: Podaci iz Prijave

Vlasnička struktura privrednog subjekta Ovidiu na dan 31.12.2007. godine prikazana je u Tabeli 3.

Tabela 3.

Vlasnik udjela	Vlasnički kapital (%)
CWP Cyprus Limited	95,00
Emanuel Muntmark	5,00
UKUPNO	100,00

Izvor: Podaci iz Prijave

Privredni subjekt CWP CYPRUS LIMITED sa sjedištem na adresi 75 Prodromou Avenue, Oneworld Parkview House, Nicosia 1307, Kipar (u daljem tekstu: CWP) je u 100% vlasništvu privrednog subjekta FORCE 10 Trustee i isti je osnovan s ciljem da upravlja udjelima u svim društvima osnovanim s posebnom namjenom u Rumuniji. Pored svoje osnovne djelatnosti upravlja i projektom izgradnje vjetrenjača.

Privredni subjekti CWP, Tomis i Ovidu nemaju povezanih privrednih društava u Bosni i Hercegovini.

2. Obaveza prijave namjere predmetne koncentracije

Ukupni godišnji prihod privrednih subjekata učesnika predmetne koncentracije na dan 31.12.2007. godine prikazan je u Tabeli 4.

Tabela 4

Ukupni prihod	ČEZ	TOMIS	OVIDIU	NERS	CWP
	(u KM)	(u KM)	(u KM)	(u KM)	(u KM)
Svijet	(..)** ¹	(..)**	/	/	(..)**
Bosna i Hercegovina	/	/	/	(..)**	/

Izvor: Podaci iz Prijave

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza podnošenja prijave namjere koncentracije, u smislu člana 14. stav (1) Zakona.

3. Pravni osnov i oblik koncentracije

Pravni osnov koncentracije je Ugovor o kupoprodaji udjela potpisan dana 26.08.2008. godine između CWP CYPRUS LIMITED, 75 Prodromou Avenue, Oneworld Parkview House, Nicosia 1307 Kipar, i fizičkog lica g-dina Enauela Muntmark, švedskog državljanina sa boravištem u Constanta County, Rumunija, (..)**, kao prodavaca s jedne strane i privrednog subjekta ČEZ a.s. Prag, Duhová 2/1444, Prag 4, poštanski pretinac 14053, Češka Republika, kao kupaca i privrednog subjekta ČEZ Poland Distribution B.V., Weena 340, 3012 NJ, Rotterdam, Holandija, kao

¹ (..)**- podaci predstavljaju poslovnu tajnu

predloženika, koji se odnosi na kupoprodaju cjelokupnog upisanog osnovnog kapitala društava Team Tomis S.R.L. i Ovidiu Development S.R.L.

Na osnovu Ugovora o kupoprodaji udjela privredni subjekti ČEZ i ČEZ Poland Distribution B.V. će steći udjele u privrednim subjektima Tomis i Ovidiu kako slijedi:

- ČEZ će steći 95% udjela u kapitalu privrednog subjekta Tomis i 95% udjela u kapitalu privrednog subjekta Ovidiu,
- ČEZ Poland Distribution B.V. će steći 5% udjela u kapitalu privrednog subjekta Tomis i 5% udjela u kapitalu privrednog subjekta Ovidiu.

Nakon provođenja namjeravane koncentracije privredni subjekti Tomis i Ovidiu će biti pod potpunom kontrolom ČEZ-a, s obzirom na činjenicu da je privredni subjekt ČEZ Poland Distribution B.V. u 100% vlasništvu privrednog subjekta ČEZ-a. Kroz stjecanje kontrole nad privrednim subjektom Tomis privredni subjekt ČEZ će steći kontrolu i nad privrednim subjektom M.W. TEAM INVEST S.R.L., rumunskim društvom sa ograničenom odgovornošću, koje je pod kontrolom Tomis-a.

Na osnovu naprijed navedenog pravni oblik predmetne koncentracije, predstavlja sticanje kontrole od strane privrednog subjekta ČEZ nad privrednim subjektima Tomis i Ovidiu kupovinom većine udjela osnovnog kapitala u smislu člana 12 stav (1) tačka b) pod 1) Zakona o konkurenciji.

4. Relevantno tržište predmetne koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta („Službeni glasnik BiH“, broj 18/06), čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjive s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Prema navedenom, relevantno tržište proizvoda predmetne koncentraciji je tržište proizvodnje električne energije u Bosni i Hercegovini.

Prilikom određivanja relevantnog tržišta Konkurencijsko vijeće je uzelo u obzir činjenicu da privredni subjekt ČEZ ima registrovana subsidijarna privredna društva u Bosni i Hercegovini u oblasti proizvodnje električne energije.

Relevantnim geografskim tržištem smatra se tržište Bosne i Hercegovine.

U skladu sa navedenim. Konkurencijsko vijeće je odredilo da se pod relevantnim tržištem smatra tržište proizvodnje električne energije na teritoriji Bosne i Hercegovine.

5. Analiza relevantnog tržišta predmetne koncentracije u Bosni i Hercegovini

Bosna i Hercegovina ima ukupan ugrađeni proizvodni kapacitet od 5,095 MW, od čega 2/5 su proizvedene u hidrelektanama i 3/5 u termoelektanama (Tabela 5.).

Tabela 5.

Hidroelektreane		Termoelektreane	
Naziv hidroelektreane	Ugrađena snaga (MW)	Naziv termoelektreane	Ugrađena snaga (MW)
Trebinje I	180	Tuzla	779
Trebinje II	8	- G1	32
Dubrovnik (BiH+Hr)	210	- G2	32
Čapljina	420	- G3	100
Rama	160	- G4	200
Jablanica	170	- G5	200
Grabovica	117	- G6	215
Salakovac	210	Kakanj	578
Mostar	75	- (G1, G2, G3, G4) 4x32	128
Jajce I	60	- G5	110
Jajce II	30	- G6	110
Bočac	110	- G7	230
Višegrad	315	Gacko	300
Peć-Mlini	30	Ugljevik	300
UKUPNO	2.095	UKUPNO	1.957

Izvor: Državna regulatorna komisija za električnu energiju Bosne i Hercegovine

Ukupna godišnja proizvodnja električne energije u BiH u 2007. godini iznosila je približno 12.255,00 GWh, od čega je ukupna potrošnja na domaćem tržištu iznosila približno 11.657,00 GWh. Ukupna proizvodnja i potrošnja električne energije u 2007. godini prikazana je u Tabeli 6.

Tabela 6.

Procjena za 2007. godinu u (GWh)	EP BiH	EP RS	EP HZHB	Brčko Distrikt	BiH
Proizvodnja	6.605,00	4.430,00	1.220,00		12.255,00
Proizvodnja u hidroelektanama	1.120,00	1.780,00	1.220,00		4.120,00
Proizvodnja u termoelektanama	5.395,00	2.605,00			8.000,00
Proizvodnja u malim i industrijskim elektanama	90,00	45,00			135,00
Potrošnja	4.410,00	3.286,00	3.341,00	290,00	11.657,00
Distributivna potrošnja	3.840,00	3.040,00	1.275,00	2.900,00	8.445,00
Veliki kupci	570,00	195,00	2.055,00		2.820,00
Potrošnja rudnika		51,00	11,00		62,00

Izvor: Državna regulatorna komisija za električnu energiju Bosne i Hercegovine

Prema podacima Državne regulatorne komisije za električnu energiju BiH, na tržištu proizvodnje električne energije u 2007. godini u Bosni i Hercegovini najveći tržišni udio ima privredni subjekt Elektroprivreda Bosne i Hercegovine (EP BiH) sa 54,0%, privredni subjekt Elektroprivreda Republike Srpske (EP RS) sa 36,0% te privredni subjekt Elektroprivreda Hrvatske zajednice Herceg Bosne (EP ZHB) sa 10,0% tržišnog udjela.

6. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja predmetnog Rješenja, ocijenilo da provođenje predmetne koncentracije neće narušiti postojeću tržišnu konkurenciju s obzirom da predmetnom koncentracijom dolazi samo do promjene vlasničke strukture između učesnika koncentracije iz čega proizilazi da navedena koncentracija neće proizvesti promjenu tržišnog učešća učesnika na relevantnom tržištu.

Iz gore navedenih razloga, Konkurencijsko vijeće smatra da se predmetnom koncentracijom privrednih subjekata ne stvara i ne jača dominantan položaj na relevantnom tržištu, te je odlučilo kao u dispozitivu ovog Rješenja.

Uzimajući u obzir sve navedene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) pod a) Zakona, kao što je odlučeno u dispozitivu ovog Rješenja.

7. Administrativna taksa

Podnosioci Prijave na ovo Rješenje, u skladu s članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) su dužni platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

8. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ibrica Lakišić